

兩  
當  
軒  
全  
集

兩當軒集卷第八

武進黃景仁著

古近體詩四十六首

人日艤舟亭探梅過飲左雲在齋頭

多時欲探東城梅披衣微曉衝風來  
釵枝栗藥一相對妙意遠勝千林開  
此意看花知葢寡罇前盡是同心者  
戰深冰雪見性情畧去元黃得聲價  
主人愛客客滿堂今夕何夕同燭光  
道衡風雨思家苦杜甫江湖引興長  
去年此日空相憶珍重緘詩淚沾臆  
兩度看花當故人故人常共花無色  
重遊拍手當花前買醉何須計十千  
傳家幸有酒鑪在除却鑪邊何處眠  
三更以後譁笑急春氣先乘酒香入

半酣已徹瓊爐圍百罰翻教玉山立我願好花常不開我  
願故人常舉杯杯停花放易分手百歲今宵能幾回

偶題齋壁

天畱隙地位方牀竹作比鄰草護牆四壁更無貧可逐一  
身久與病相忘生疏字愧村翁問富有書憐市僧藏漸喜  
跣趺添定性大千起滅滿空光

舟夜寄別左杏莊

時別家  
一日也

水聲到枕今何時醉中別君心自知扁舟夢斷五更冷風  
雪無邊助淒警傾耳微聞折竹聲推篷已失蜚鴻影別時  
梅花飛滿觴坐君花下之草堂相看都怪語言少一夕離  
居已斷腸歸夢今宵路猶憶明日相思在江北牛渚風濤

百丈深歷陽烟樹千重黑差喜百年交道真不須零落苦  
嫌身更將愁水愁風意寄爾高歌擊斃人

悲來行

我聞墨子泣練絲爲其可黃可以黑又聞楊朱泣歧路爲  
其可南可以北嗟哉古人眞用心此意不復傳於今今人  
七情失所託哀且未成何論樂窮途日暮皆倒行更達漏  
盡鐘鳴聲浮雲上天雨墮地一升一沈何足計周環六夢  
羅預間有我無非可悲事悲來舉目皆行尸安得古人相  
抱持天空海闊數行淚灑向人間總不知

烏江弔項羽

憤王遺像黯承塵已事空悲五裂身百二山河銷赤炬八

千子弟走青燐好尋鬼母揮餘淚自有獅兒作替人王氣  
東南來尙早不須亭長在江濱

橫江春詞

門外晴洲香草香浣紗生小愛春陽柳絲幾尺花千片蕩  
得春江爾許長

不羨成都濯錦新鴨頭一色皺魚鱗逢人都道風波惡如  
此橫江思煞人

家住橫江古渡頭年年江上望歸舟郎若歸時今日好常  
時那見水平流

瀨水浣女祠

覆舟漁父共心期識在窮途死固宜豈必士爲知己用曾

聞事不使人疑沈埋情種潭千尺來往英靈風滿旗試問  
若耶溪畔女可應羞煞沼吳時

對月感懷

對酒欣相共鉤簾不放遮低徊問清影辛苦照誰家秋士  
霜前草春人鏡裏花看來俱有盡終古一長嗟

飛騎橋

鼓吹聲沈樓櫓消紫髯幾爾困雄梟半生意氣三篙水一  
騎飛騰兩版橋引袂創深凌盪寇停罇涕破賀公苗經看  
壁壘眞兒戲尙有垂楊映畫橈

廬州客舍寄宜興萬黍維時黍維將來而余又將  
之泗州矣

高齋日暮寒孤幌客中楊柳垂垂長驚心春事日漸闌故  
人不至何由往笑聲在耳言銘心良會無多易疇曩抱柱  
曾慙橋下期買舟未果山陰訪出門時約過黍維竭來閉  
置金斗城坐席未溫車鐸響依人去住不自由身與桔槔  
同俯仰聞君亦欲看山來吁嗟道路疲吾黨後先蹤跡良  
悠悠破壁畱詩拂蛛網鴻雁猶歸江上音煙波不共淮南  
賞料爾裝成罨畫溪尙有落花隨畫槩

清明後七日雨中宿浮槎寺階下紫牡丹一本開  
盛有二百餘頭笥河夫子作歌命和其韻

高僧得句夢子瞻石泉淙淙榆火炎身遊一徹未來境看  
花更使游心屢虛涼佛地盡諸相恍見天女空中拈一百

六日過雖瞥七十九朵誰先占

見清異錄

桐風吹雨雲暗牖眼

界燦若初陽暹山深地古春力厚芳菲疇識先時覘野禽  
銜瓣著佛頂長蛟結網攀茅簷不憂傖父肩上擔時怯樵  
子腰閒鏹怪渠骨相匪枯槁所置身處何其廉問花毋乃  
太自苦良久不語花口籍花如道我代花答託根有土百  
不嫌魏家千葉本冠世苦被俗論相髡鉗有心終是恥王  
後遺世獨立逃鼓儉非花我已得花意卻笑積習徒沾黏  
慈恩深院古所賞顏色豈肯長淪淹解畱光豔照我輩眞  
識遠勝千夫兼臨風顧影若意氣爲見學士拈髭髯三章  
倏似大篇易魂攝筆底花懣懣藉令相見稍前後空山韻  
事誰能添深龕彌勒亦莞爾笑我小綴言詹詹夜分花睡



我亦睡切勿放下蘆花簾

浮槎山寺

舊志山自海上浮來梵僧見之曰此者閣一峯也寺爲梁武帝女捨身處

山形如槎雲浮浮者閣峴翔雲上頭

梵語靈鷲山爲者閣峴山見水經注竺法

維西來意祖三弟子一塊淨土虛根畱梵僧碧眼親識得

指點怪秘傳千秋山靈非神亦非鬼夢落深宮愁帝子夢  
中山在縹緲間按圖來求走中使一朝覓得隨布金山花  
笑指宮車臨鉛脂洗淨功德水富貴了寂鐘魚音此時老  
公失精魄刹帝利來徒面壁空談已著旬波魔百身那懺  
臺城厄金甌已缺荒故宮劫灰畱鎮無心峯珠珞散爲塵  
土盡樓臺半逐雲烟空從此槎浮失歸路天女常畱散花  
處天邊驚駕如可招卻跨山頭決空去

山閣曉起

一榻重嵐裏酣眠卽道心  
澗幽琴響枕雲厚絮添衾不識  
夜長短那知山古今來宵塵驛夢何處更相尋

泥塗嘆

經旬滯愁霖春泥苦融泄但積征途艱那補漏天裂沈濁  
潰欲浮流陰蕩難閉頓令如坻平投足起窳凸略激顙已  
過甫涉髀先滅譬作瀚海行中道勢無輟誰能坐衣冠或  
可養魚鼈汗下聖所悲欲往氣爲結未免相經過疇能避  
湔涅蜀道胡云難隴坂未嫌折尺寸有可持遑復畏蹉跌  
縱有穆馭良爲功遜乘橈足土苟不離都盧等跛蹇幾訝  
方者輿不爲載重設人憾那得齊勞生動膠轕僕御嗟何

辜先後百推拙將毋累微軀心境兩兀艱畢景不半程用力亦云竭前途更淤沕欲鏹無巨鐵所望陽光開庶聞嘆聲絕

合肥城樓

箏笛聲消極浦間逍遙津水尙灣環英雄浪捲都無跡城郭珠沈竟不還生惜文鸞名似錦舊傾韋虎望如山登樓此日容清嘯詞客淮南鬢已斑

定遠

重岡百盤疊勢與遙山爭淮雲一片落遠見南譙城高樓矗三兩雉堞蒼蒼明岡轉忽不見漸聞雞犬聲馱鈴閒市喧卸裝孤館清烏烏起畫角月上詩已成稍進館人語閒

數來朝程飯冷酒力薄淒苦中宵情平頭促就枕明發宜  
五更一笑遺之去且當吟洛生

紅心驛

茅檐三尺五里長牛馬矢雜泥築牆牆頭時出野花朵辛  
苦細趁行人香紅塵欲暗日卓午綠柳尙綰時青陽急須  
小憇飢尙可不妨夢罷炊黃粱

夜過黑山宿澗溪

雨程易陰晦不料夜已果極望無人烟悽惶落途左有山  
當我前黧黑夕靄裏稍入意已迷甫涉路無安撲額崖奔  
崩仇足石碎瑣怪光瞞屢凝寂響魄虛墮一水忽界空遠  
現白瑳瑳波聲漸碎匍山徑更埒坳何因喜忽狂嵌天見

村火逝爲褰裳行捫石少危坐

不識水深淺連山落長堤堤水互出沒逕涉忘東西游魚  
觸我足溜急風淒淒中望渺涯涘四索鮮據攜行行偶出  
水一綫浮沙泥恐極失軀命悲淚翻淅淅烟中忽人語境  
幻慮百迷行近覺漁舍伊軋巨網提叩言岸將及霍然心  
坦夷經過得此險世路無高低投村賈餘勇已有晨雞啼

望泗州舊城

泗淮合處流湯湯作此巨浸如天長長天垂幙晃欲動區  
區城郭何能當城雉齺齺出波尺高谷深陵感疇昔十萬  
樓臺罔象居千年生聚蛟鼉宅號聲未絕波壓頭人身魚  
首隨波流當衝水伯擇人啖餘者到海流方休可憐生氣

今未息水上綠烟時蕩浮有山濱湖州已徙草草依山作  
廛市我來正值春水生下者依然在中汴屋角帆開幾尺  
風牆頭釣下三竿水若遇海上王方平卽此又是蓬萊清  
嗟嗟橫目一何慘令人慷慨思平成我念徐揚一隅地下  
流稍富魚鹽利防河堰築連雲高此間詎免迴瀾沸伊誰  
繪此生靈愁獨立蒼茫一垂涕

登泗上樓

竟夜轟濤似鼓聲登樓水勢與雲齊百靈自掣龜山鎖萬  
怪須然牛渚犀對此茫茫空禹跡笑人寂寂有隋堤故鄉  
東望揚州近說到風波夢已迷

泗州喜洪大從姑孰來

貽山枕洪澤淮濱勢瀆滉壓山十萬戶枕席波聲上水氣  
裏爨烟居民雜象罔推窗納揚徐披圖驗墳壤詭秘信莫  
窮臨覽斯云廣俯仰雲濤閒太息成孤賞所思苦未遂所  
苦忽復申輕裝犯腥雨長揖來故人故人青霞侶嗜好昔  
所親巖中易成別遊駕每同騁去歲江淮閒輾轉如浮梗  
看山盡黟障論水達汝潁各吐胷中奇分揚出才境酣采  
君怒張清氣余薄領相樂傲行路依依似形影濠州仲冬  
雪置酒行別君參差歸雁行前後依斜曛梅開故園早時  
復同酒樽相顧忽不樂前路云將分余攀小山桂爾訪天  
門雲從茲一失去方嗟別離始何意馬牛風忽會東西水  
前日得君書知君隔江住對酒歌青山當筵舞白紵舊日

同歡場憐君獨行處來時江北道應落千棠梨春水久漣  
漫將毋頓塗泥高驄爲君秣斗酒爲君攜灑掃湖上閣放  
爾爲雄詞百怪待彈壓首者無支祈

偕稚存望洪澤湖有感

濤聲入耳心所嚮與君同家楚江上比年渴走塵埃閒見  
此洪流亦神王湖寬一面青嶂開立久萬仞高寒來水風  
吹衣日落去石氣蕩魄雲飄回遠天黯慘湖變色雁飛不  
度鳴何哀沈淪九鼎自太古蒼茫那見螭珠吐浪靜似響  
蛟人機風便欲遞馮夷鼓此時倒影動樓閣咫尺已畏風  
雷作前驅青兕淮神過長波硤巖大魚躍得觀如此將毋  
歸回頭半湖森雨腳大陸浮沈且未休吾儕身世將安託



歌聲如哭何處歌沿山半州純浸波庚辰奚仲不在世嗚呼奈汝歌者何

曉過滁州

四山過一雨城門開綠陰角聲起木杪一散嘔啞禽抱城水瀾瀾過客驅車臨犬吠不出郭人烟多在林依依識熟路了了悅方音客冬記經此歸路方駸駸雨雪迫徂態所歷無幽尋茲來春夏交烟景何沈沈層樓隱疊巘長雲蔽遙岑最高知瑯琊翠色披滿襟側聞釀泉水云可醒人心行伴苦相趣凝望愁淫淫兩度不一訪有愧茲邦深

羹頡侯塚

掩釜何如轢釜來區區恩怨事堪咍可知大度輪臣叔肯

向軍前乞一杯

客冬從滁州肩輿至瓜步輿夫老壯各一今過此  
壯者復舁余行問其同伴則去年從瓜步歸病死  
於道矣爲之愴然賦詩

崎嶇風雪裏送我渡江行健語因貪醉逢山每報名遽看  
筋力盡能免涕洟橫爾尙會相識前途酒共傾

過金椒哭凱龍川先生

有序

戊子鄉試公同考入闈景仁受知於公薦而未售  
庚寅公再入闈中疾作同事諸公皆危之公曰此  
輩辛苦吾以身殉不惜也披閱不輟竟卒景仁頻  
年奔走終未得一展拜盡弟子之禮隱隱之中上

負知己今過所治不覺愴然爲此詩也

臥龍山勢盤嶙峋驅車欲過車摧輪前途叱御且休發腹  
痛爲感生平恩甘棠到眼盡遺愛摩挲惻愴傷心魂生無  
一面死未哭此慟不比西州門三年枉自設虛位那盡生  
存感恩誼此日青山疊疊愁當年紅燭條條淚辜負看花  
住馬心不才自分甘拋棄苦爲方干抵死爭誰知爭命原  
無計此曹心力鎮相憐反自拋殘辛苦地兩度戰場餐血  
腥先生手持千佛經飄然上赴玉樓去爲道此間多不平  
遂令感誦溢吾黨豈獨賤子緣私情暴腮黥額無所憤從  
此江東亦將隱斥鷃何來負翼風螭螭只附傷心本丹旂  
多時返故鄉楚雲燕月兩茫茫可知德政崇碑下尙有門

生弔夕陽

飲全椒城南江氏園

水煙中豁飛彩橋清歌隔水聲相招衣冠忽集晉南渡竹

石占斷梁北譙三三月尙殿春在

時開三月

七七樹已愁風飄

庭前杜鵑將謝

可憐閒處好欄檻明日牆外鞭絲搖

雨中過夾山

始夏天驕陰濱江地拳絳山回忽幽幽衣溼常漠漠林末  
盼侶稀巖際懸裝薄後徑訝拒前起勢悟藏落雨氣合四  
圍頽景反埋壑白石參沈雲回光閃儵爚中轉百里雷上  
突千紀鶴瀑注甫避踵谷響屢應躡冥搖朱草莖暗護紫  
庭鑰恍逆真靈過深恐光怪作奇賞逝莫追理境鬱難拓

謝客不可招茲觀坐消爍

浴湯池

俗名太子泉在和州

瀕江多溼居物疵帝心悼厥力藉熨攻首事資潤導漏液  
坎莫縫立柴釜時燠檻脈根熒臺風戶位丹竈蒸沸爲雲  
浮望氣知候到沆瀣迴陽輪瓔珞結風纛詎惟起痿痺實  
亦功旱澇遠客至以踵居民多見耄心悅銳先裸膚切怯  
初蹈腴理覺豎奔膏肓擬丁鑿疾去喜微眩漿流患真耗  
霍然起披衣羣山動孤操

橫江曉渡懷張如良秀才

掛席指碧山長洲屢回互晴霞媚餘鮮微波淬輕素隱隱  
金陵城蒼蒼厯陽戍東西界徂川低昂起中渡絕流爭去

心戀舊淹回顧乍聞榜人歌彌切之子慕念我漂何歸思  
君美無度結桂閒層阿折麻悵歧路風波一阻長永矣愁  
朝暮

樓上對月

飄飄白袷當回風三五月照高樓空一城露瓦高下白幾  
處已滅窗燈紅病怯臨窗倦憑几苦被鐘聲促人起樓頭  
皓魄已天中郭外青山如夢裏濛濛薄霧蒼蒼烟山意亦  
如人可憐一絲清氣其來往星辰自動高高天風景依稀  
似前度此閒恍是高寒處夜深誰念朗吟人願化遼東鶴  
飛去

聞龔愛督從河南歸

不飲忽忽傾千觴朝聞故人還故鄉夢魂飛渡京口樹覺  
來海月烟茫茫七年南北頻回首別後狂名滿人口結客  
都從燕市多愛才肯落平原後昨夜聽鷄函谷來衣裳紫  
氣猶餘否洛陽縣裏花愁風銅駝陌頭荆棘叢知君懷古  
意鬱勃乃使黃河一綫盤君胸緱山唳夜鶴少室聞清鐘  
下視唐陵漢寢竟何物嗚呼此遊真足驕吳儂我行瓠落  
無所惜歲歲年年去鄉國所媿平生拜母交阿蒙碌碌常  
如昔北海空勞薦禰書仲宣未是依劉客太白樓頭不見  
君謝公宅畔苦離羣欲邀紅燭三更話除借青山一片雲  
我輩相望各蒼老萬事期君致身早不然痛飲酣青春坐  
擁列鼎兼重茵哀絲激肉寫懷抱堂前醉倒三千賓出門

大笑忽萬里莫使醯雞笑煞人

夜步池上

獨居每不樂臨軒怱怱快主人好池臺良夜誰過訪烟月  
鷗已盈幽意成一往地僻驕颺颺園荒悅榛莽百卉遞暗  
馨微風愜孤賞擾枝識禽翻靡草辨蛇狂轉緣境蒙茸寄  
此懷颯爽屢步蕩虛氣微哦破沈響竟漏將何悰銜歎歸  
空幌

久雨寄示顧文子

梅雨經旬未放陽舍南舍北盡汪洋只疑天意驕河伯可  
念人窮到子桑巨蝮公然爭臥榻轟雷多半雜崩牆故人  
鄰巷無消息問訊明朝駕一航



調顧文子兼示穉存

久憶東吳顧文學南州客況故依然  
參苓半減經師俸蔬筍還供都講筵  
懶甚拋書妨坐臥養深持論徹中邊  
東頭尙有窮書記妒爾天涯比屋緣

失題

我家乃在東海東蜃樓見慣心空空  
十年弔影深山裏每顧山翁亦心喜  
生耶滅耶何足嗔一嘯一笑誰爲真  
偉哉造物焉用我不幻烟雲幻此身

花津

一燈低昂向船入萬兀千搖至津口  
船頭正與沙堤平拂面毵毵水楊柳  
風前魚鼓已報更岸上人家尙沽酒  
客來

小飲飲卽醺三兩依依話村叟歸塗忽散草上螢顧影防  
驚竹閒狗時清喜無盜賊警波平未是蛟龍藪江湖自我  
野興長鷗鳥於人宿緣厚沈吟露下那得眠獨倚篷窗數  
星斗

過高淳湖水新漲舟行蘆葦上十餘里

前舟疾如飛後舟忽追及何物舟背沙沙聲葭葦叢中靡  
舟入初疑舟在淺水行蓑蓑尺五黏天青誰知一篙不及  
底五月已見湖波平我昔經過始冰渙水枯盡是黃沙岸  
等閒重作倚篷人浩淼芊眠一懷斷如雲帆影去復來似  
雪沙鷗聚還散先時弱質易驚秋此日偏令遠目愁霜清  
會見根株出莫送飛花上客舟

高淳先大父官廣文處也景仁生於此四歲而孤  
至七歲始歸今過斯地不覺愴然

茫如積世渺疑塵苜蓿荒齋幾度新當日白頭猶哭子而  
今孤穉漸成人同驂竹馬應無伴反哺林烏尙有親歸去  
恐傷慈母意莫將風景話酸辛

錢塘江舟中看月

越峯青斷海門青之字江流入杳冥月出島烟常帶溼潮  
回沙氣半浮腥眼將天水分離合身與魚龍判睡醒烟外  
何人尙吹笛夜深愁激子胥靈

富陽

曉天瞳瞳江漠漠估帆四開估客樂樟亭飲來酒未消已

在富春城下泊潮來直浸城根平城門盡開聞市聲人居  
此閒亦何好水色山光餐不了沙頭愁煞捕魚人捕得魚  
多賣錢少

過釣臺

桐君入我夢趣我推篷起一鳥啼巖閒雙臺峙雲裏十載  
道旁情惟有狂奴耳更酌十九泉飽看桐江水

新安程孝子行

孝子名文元歙之洪坑人母疾刲左臂以療逾年  
復疾孝子將割其右爲姊氏覺急掣止之相守侍  
疾不與以便母竟卒孝子廬於墓三年歲時輒向  
墓號慟至今如常嘉興鄭誠齋先生掌紫陽書院

時孝子嘗從游先生詳言之雖跡近愚孝然其愚不可及矣爰爲作歌

新安江水何粼粼我聞一歲來問津問我何數數愛其地  
氣盤礴人風古淳山高澤深土膏厚宜產獨行君子先天  
民六年往復卒未見匪不可見難乎真有程孝子洪坑人  
是果以孝親其親行孤跡晦人罕道嘉禾夫子爲我言之  
頻言其去歲來負笈見其戍削骨立如束薪顏色雖黯慘  
其中含古春經年其寢處曾不輕笑嚔退乃察其隱悲淚  
流盈巾問之不肯語卻立常逡巡一風吹衣露其肘有大  
如掌瘡癰新孝子不及掩窮叩乃得知其因生年十三五  
常如日初寅嬉戲父母側謂此若可終其身一朝父也天

所奪搥胸慟絕呼蒼旻方知父母年瞬息皆堪珍回頭顧  
慈母夕若不保晨思父兮斷絕事母兮苦辛晝行不離側  
夜臥不沾席與茵積此垂數載母病牀吟呻孝子卒無計  
割股可療聞之人是夕風雨急黑雲垂車輪抽刀暗室室  
生白搥肉多處揮如銀肉乎我母寄汝命快意一割無由  
輟作羹進母霍然起吾肉效矣他何論背人出瘡處隱隱  
還鱗鱗是何靈異無所苦合處若有神鍼紉無何母病忽  
大漸徹晝夜侍無欠伸俄然起四顧出屋行遠遠姊氏怪  
其狀偵至趨隨塵見其持刀袒臂向空祝側目視臂刀且  
掄急從後至反其臂責以戕體傷親神從茲形影不相失  
母亦奄逝當茲辰孝子長呼姊誤我一毀不復能支振三

年廬墓如一日近淚赤土無荆榛林深地曠絕聞見皓鳥  
鵲雀日久投懷馴至今歲時省墓輒號慟慟時四野愁霾  
屯我思孝子孝愚乃成其純世人薄天性勦說搖其辱毀  
傷固有戒殺身亦成仁百無可冀冀一濟一髮尙欲回千  
鈎此時遑及引文義何者孝子何忠臣先生聞言亦領首  
命我縱筆爲敷陳自慚腕弱不能達賒願欲貢王爲賓景  
星祥鳳出示世一挽末俗歸於醇不然刻君黃山三十六  
峯頂坐使姓氏萬古同嶙峋

兩當軒集卷第八

兩當軒集卷第九

武進黃景仁著

古近體詩七十二首

袁陶軒約早起看瓶荷盛開

倦夢如塵掃不開披衣欲起更徘徊平生不負看花約拋  
得冰紋簾子來

淨几疏簾供若仙膽瓶猶說太和年盛來盡化楊枝水那  
得開花不可憐數年前陶軒之鄉人鋤地得古塚多藏瓦  
器滿貯水作綠色上有刻太和四年者茲  
其一也

豐山古梅歌

并序

梅爲宋杜先生默手植先生祠在焉莓苔蕪沒鮮



過問者乾隆三十七年安徽督學使者朱筠河先生按部至和州爲作亭刻石於上歌以記之

伊誰植此春風樹花下作歌人姓杜猿啼鶴唳空山空身後誰來作花主先生之歌一世豪曼卿承叔真君曹先生花癖何所侶魂夢一清都似水愛花種樹花卽家較比逋仙富孫子十年作尉不救貧四海結交誰更親獨將光怪不磨氣分半壽得花精神青天鸞獻去飄忽坐使名花慘淪沒霜冷飄殘博望鐘夜深掛住蛾眉月寂寞苔蘚荒寒烟閣世經今七百年傳聞幾年花大放物色俄驚至天上風流使者乘傳過下馬空祠爲惆悵洗幽刷夜回陽光夏玉鐙金出高唱緣以亭檻崇之碑誦之守土僉云宜重來

置酒花墮醖一片贈與公相思文人從此出顏色幸是相逢有文伯不見東風昨夜來古香吹遍江南北

贈袁陶軒

近爲五言誰最長袁氏之子才英蒼是其家居溟海上沐浴百寶之靈光豈獨論詩意相可母老家貧亦如我負米還兼負笈遊五載重逢話燈火朗吟時一飄檐花細雨時聞落山果憐君家世本崔巍廉吏之子今難爲道中西華竟誰識座上北海真君師時偕從鄭誠齋先生遊師門恩重邱山比青眼高歌望吾子莫將歌哭向時人自有名山報知己不才似我分飄零敢託微波寄賞音須知親在兼師在方識君心卽我心

贈別沈子孟

秋氣漸搖落吾徒合放歌但看君意得始覺我言多曲以  
無絃韻顏常不醉醪自知聞道淺慰我欲如何

款款芳樽合迢迢蘭夜長無端成感激此意在微茫鶴送  
三更唳蟾懸萬里光相思與江水明日下錢塘

水碓

更笑桔槔拙無心自轉環水因灘愈急人與碓俱閒獨火  
明遙夜疏聲徹四山誰知傾聽者愁鬢欲成斑

退潭舟夜雷雨

山僧夜半敲石火照見古壁騰龍蛇巖風忽刮一燈滅驚  
起百鳥鳴嘔呀千林萬竅浩呼洶俄頃急雨翻銀車嶺頭

墨色接天色白處雨腳垂如麻我舟忽爾移斷岸噌吰水  
石聲交加舟人繫纜爭性命千丈一落分毫差懸崖怪樹  
電光裏龍顛虎倒猶盤拏誰知暴雨不終昔打篷漸歇箏  
琵琶前山已復掛銀漢隔岸尙見飛灘沙當窗絕壁不能  
上薄雲來往明於紗草頭點點散螢火水上閣閣鳴青蛙  
新涼美滿雖快意但破好夢方還家

吳山夜眺

高閣倚清虛深宵縱目初月浮江郭動星傍海門疏淚已  
乾羊祜情當死伯輿如何淩絕頂難挈化人裾

山館夜作

步虛聲寂散羣真夜色平鋪不動塵雲影自來還自去最

高山閣未眠人

城郭人民別想勞  
看來身世總秋毫  
此時萬戶應同夢  
上有白烟低復高

長夜山窗面面開  
江湖前後思悠悠  
當窗試與然高燭  
要看魚龍啖影來

十八夜

角聲風斷處月黑  
四林秋危坐忽消  
燭高吟欲震樓濤  
頭盤地轉海氣等  
身浮尙有越山色  
烟中相對愁

暮歸北山下叢木  
頽垣未知何人祠  
也蒼涼獨步

悄然成詩

樹中出鈴語覓徑  
經荒祠星光滿空  
廓照見欹殘碑欲  
讀

不能審悄立回風吹輕塵旋成陣墮葉飄相隨屋角落烏  
羽草心繫蟲絲人跡一無到精靈沓來窺憐余嗜幽僻不  
礙拈吟髭明朝脫經過盟手陳江離

游漪園暮歸湖上

名園負郭水爲鄰水上垂楊繫馬頻尋遍舊蹤疑隔世畫  
來秋色借全身池臺入暝難畱客魚鳥能愁不近人若說  
西湖似西子此時意態只宜顰

洪忠宣祠

啖雪龍庭十載餘辭家猶憶建炎初兩宮辛苦餐梨麪萬  
里烟塵遞蠟書事去僅歸蘇武節身閒聊傍葛洪居湯陰  
祠墓還鄰近可共英靈感故墟

登石顚山

草閒尋得逕絕頂豁雲烟漠漠風寒石冥冥雁沒天塔標  
銀漢外寺圯劫灰前只隔西湖水歌鐘萬戶喧

由烟霞嶺至紫雲洞精舍

日出倚湖棹陰嶺此孤發叢篠時鉤衣晞露漸盈襪已有  
樵斧聲丁丁出深樾欲叩徑所從尋聲易飄忽稍稍開停  
雲微微辨琳闕夜梵悄已沈晨鐘閒將歇入門見夷光沈  
照坐巖窟洞氣凝古香雲根抱臞骨相對我亦忘焉知境  
超越君聽幽澗泉泠泠幾時竭

黃龍洞

一名無門洞

未縋三千級先瞻丈六容無門窺法藏有地立雲蹤我識

泉皆眼人言錫是龍慧公如可作應許叩元宗

金鼓洞

祇激風泉韻何來金鼓名泥難縫地裂石忽使天驚斷脉  
迎人氣虛中學語聲幽潭睡何物時有怪雲生

大佛石

舊說明湖是海邊人民城郭總茫然卻餘精衛未銜石遂  
有祖龍來繫船骨立何心邀錦纜尸驅差喜脫神鞭山靈  
亦解滄桑恨遺化西方丈六仙

戲題酒家

我亦曾裁一幅禪翻於此處買深樽出門欲脫青衫典先  
道酒痕非淚痕



前度詞人今白頭往來曾閱幾人愁短章已汙君家壁試  
看碧紗籠得不

過賈秋壑集芳園故址

風月平章賜第年一山樓閣半湖船若論相業慙何地便  
有仙居借自天遼海幾時歸別鶴洛陽空復愴啼鵲半間  
後樂俱荒址滿路秋蟲咽暮烟

僧齋夜坐

四圍蕭瑟竹聲秋空僻雲房獨夜愁風雨忽來人定後星  
河猶掛樹梢頭無端階犬迎空吠有恨窗螢自暗投沈坐  
頓忘身客處近城更鼓是杭州

問水亭

薄暮高城破鏡飛滿湖誰解愛清輝多情岸上人家火賺  
得酒人無數歸

剩有狂奴占寂寥烟中舟子自相招放舟今夜誰邊宿只  
向水香多處搖

湖樓夜起

漁舸歌舫寂無蹤夢醒湖雲第幾重捲幔水風能破醉鉤  
簾斜月似窺儂暗中草氣兼秋氣烟外山容似病容若爲  
幽人伴遙夜一僧樓上自鳴鐘

湖上雜感

遠山如夢霧如癡湖面風來酒面吹不見故人聞舊曲水  
西樓下立多時

水寒成陣怯衣單  
落拓愁懷遣倍難  
薄負才情合憔悴  
可憐閒煞好關干

雨中遊桃莊看飛泉

卽東坡題  
聽泉亭處

搜石乃得泉  
泉流更洗石  
石淨爭天青  
泉飛化虹白  
山中連日雨  
深塢絕行跡  
誰知穿雲來  
乃有問泉客  
左右問澗聲  
尋源固不隔  
懸崖忽當面  
飄沫時濺額  
俯掇星迸潭  
仰怖雷破壁  
一與洞壑緣  
分支已千百  
稍戛旋翻銀  
微渟頓澄碧  
大海及汗潦  
安知後所適  
保茲在山心  
莫忘初境窄  
逝矣眉山翁  
誰歟證心獲

鳳山南宋故內

廢苑年年長綠蕪  
小朝廷此忍須臾  
久將去路歸滄海  
尙

可勾人是聖湖家法請成援越絕心傳行樂擬吳趨是會  
閱得興亡處錯認江山作霸圖

葛嶺暮歸

湖岸烟塵過雨清繁絲促管悄無聲水風蕭白鷗羣散山  
日荒黃我獨行破寺陰陰飄柿葉晚汀漠漠謝蘭英尋吟  
自愛幽涼地反覺悲秋氣漸平

水樂洞

地籟此焉得了非絲竹桐有人聞帝所何日到山中近覺  
泉生石因知水韻風金庭當不遠絕穴可相通

雲棲寺

五雲山矗行復低縱橫十八澗九溪何山不雲此閒好入

塢忽逢雲所棲漫空綠雨竹千頃入不辨出雲俱迷鐘聲  
道客出蘭若步擔一二逢闍黎蓮池蛻跡此焉在一草木  
意皆含西嵐形龜抱定光見鮐皮如腊山肩齊和南乍了  
嗒相對師乎何語相提撕旃檀噴鼻和蒼蘂伊蒲果腹甘  
餕飧齋餘寺後看巖澗腰腳縱好須扶藜蘚堦四漫泉漣  
漣藤壁獨裊煙淒淒回峯閃綠埋倒景急瀑掛練飛長霓  
延緣復值徑窮處嶺頭尺五天抽梯飛空騰擲我無具有  
不盡意輸黠縣名山幾處過如霧眼膜欲刮無金篴今宵  
且可抱雲宿忍待日出窮攀躋

虎跑泉

性公元和閒掛瓢偶來此愛此山氣佳無泉亦將徙道逢

白鬚人長跪乞畱止朝見雙於菟乃是兩童子盤旋忽不見已有一泓水問水何方來南岳幾千里龍象一帖然天人共歡喜至今鳴絃聲淙淙碧巖裏青蒲偃其旁綠蘿影其底但啜泉味佳其人可知矣一彈幽澗音再鼓松風起

龍井

一路風篁韻行人度嶺來逕緣花宛轉澗與水潄洄孤往追巖客空心訪辨才過溪亭不遠小憩亦佳哉

轟雷何處轉絕壁響龍泓物外齊乾澇山中誤雨晴不因風斷續常掛月空明但莫然犀逼幽靈自不驚

舊說湖山石茲窺眾妙門浪蒼天補色窈峭地掀根面久無畱影捫多已有痕更憐幽草碧趺坐每生溫

靈芽原有種他處遂清腴地借雲千葉僧分水一盂腸輪  
猶自轉舌本已堪扶畱與松房隙他時位竹鑪

一按太虛記長懷玉局仙烟霞無改色丹碧是何年寂寂  
諸天雨寥寥此夜禪明朝下山路回首定悽然

### 浙江亭

朝潮暮汐幾時休閱得吳兒幾白頭前度客驚霜雪老最  
高吟倚海山秋蛾眉月掛愁千里魚口風吹阻萬舟明發  
赤亭西上路片帆飛溯浙江流

### 黃山問道圖爲范懷山作

范善  
醫

不知山淺深安測道今古千雲隔今萬雲阻縹緲高真此  
宮府山之神兮林林而央央是守天地之戶陰陽所藏坎

離獻胎息日月輸精芒其人在山山亦壽等閒草木皆靈  
長持將示世人不識杳絕紅塵詎能覓何來乃有方瞳翁  
自掃青霞踏青壁木魅嗥君旁山猶歛君側還丹不求求  
欲得自把精誠破山石黃圖之精吳樞子當日尋真亦來  
此登空躡岱徒茫茫采得靈源後天死爐烟裊作天都雲  
龍尾才拖鼎湖水頻行畱有嘗藥方一一皆能鑄顛齒翁  
今訪此非自仙欲遣大地蠢蠢全其年至人使物不疵厲  
孤往那惜芒鞋穿或云巫彭不升岐伯天草根樹皮無妙  
道黃軒肝鬲橋山崩靈蘭玉版言無徵安知雲驂氣蹻隨  
地足不到聖處誰能乘容成子浮邱公往來只在茲山中  
有時化鶴似童子有時化鳧如老翁樵夫牧豎不可以皮



相往往出沒游戲隨雲風翁行前路定相識拊掌一笑山  
桃紅翁乎入山莫忘出多少扁廬待翁活

七里瀧

海潮連日大直過子陵灘助以乘風便都忘上瀨難山圍  
青步障水皺碧琅玕長憶披裘客空江六月寒

賀齊廟

在淳安

公苗英爽練江邊擊賊威名自昔傳舊地赤烏開郡縣當  
時白梃費三千掃除山越瘡痍合倉卒淮淝涕淚連父老  
那知開國事祈春賽臘自年年

新安灘

一灘復一灘一灘高十丈三百六十灘新安在天上

稚存從新安歸而余方自武陵來新安相失於道  
作此寄之

來鴻去燕江干路露宿風飛各朝暮多時相失萬重雲忽  
又相逢不相顧吁嗟吾輩有底忙悵好年華此愁度君飲  
新安水我客錢塘城風巖水穴每獨逞此閒但恨無君行  
君下嚴陵灘我上富春郭日日看山不見君咫尺烟波已  
成錯卸裝孤館開君書知君去纔三日餘君行盡是我行  
處一路見我題詩無吳山越水兩迎送今夜追君惟有夢  
贈程厚孫時爲厚孫作書與汪容甫定交

繫余抱黠陋研弄鮮精業橫陳撫遺經屈口先嚙而解  
嗤俗儒鯁論何哮呶識字得未曾異同先撫扱赧顏強師

承抱膝未見韜細或吹牛毛紆或旋螺甲虛或逃芒荒挺  
或走偏狹六籍坐泥蟠鏗響誰與攜何如返崇山沈冥守  
雲匣何如老秦壁璧玦任頽歷雖然千百年名義固非乏  
緬維炎紀英紛綸工羽翼名象微言該訓詁精理洽下際  
閭洛彥闡聖在心法亦坐門戶煩孽庶相攻劫所貴觀其  
通不廢如裘袷亦如導支流納浸需啟牖亦如冶洪爐金  
沙融一霎誰爲同心言痒處與搔指邇欣邁程子高談快  
傾峽爲難有家世此任在肩胛傑觀卓不羣雄步坦無跲  
覘所下帷處望氣已爲憺百城富擁桓萬軸架盈鄴時出  
金石獻聲發不能飲遐哉作述心曠世共呼歆告我獨學  
難業成資輔夾奈何威鳳資友我等鳬鴨我識江都汪投

分差可恰匪特經無雙羣言工貫插平時氣炎炎可望難  
可狎論文忽幽渺境擬月寒硖遂與俗殊尙狂名紛喋喋  
知君求友殷招來爲飛劄文陣各挽強敵勑兩無怯我爲  
壁上觀目定不及眨名山讓公等吾行荷鋤鋤

秋日讀書不疏園贈主人汪實夫

繞歎皆山我看遍見山太多山亦厭田稜高下峯嵐童石  
腹輪菌秀靈欠西行十里忽渺綿遠林蒼蒼波潏潏如繩  
大路搖鞭絲似黛遙山界車幘美哉此鄉宜有人勝處卻  
被君家占略經邱壑皆文心別埽烟霞築吟坵君家名園  
先世貽維何藏之富鉛槧陸家充棟曹盈倉養就君才許  
華瞻相逢意氣山爲傾倏見揮毫天可挾苦將輕樸塵齒

牙何異蹄涔比天塹肯容庶質已幸叨許借書抄益愁忝  
半生無術孟浪遊五字未工窮有驗知君博我良苦心祇  
恐病處難爲砭反思昨夢天風吹百尺樓頭位書劍早知  
此景眼前得何事十年徒羨豔吾徒亦有二三子天涯獨  
學勞遠念行方作書慰藉之書成已有雞鳴店

時方作稚存杏莊書

題汪松溪遺集并所著詩學汝爲

實夫之父

近世作者何紛紛牛毛麟角誰能分文人傳否生未必要  
在光燭能常存先生往矣遺稿在我得讀之從後昆豈其  
天意假司命乃遣大雅來扶輪文章可解妙難解望候但  
覺春溫溫慨然想見公爲人坐公讀書秋樹根不疏之園  
鄰鄭村村人往往罕識面鍵關晤對惟皇墳屏除一切可

已事放作百劫難刊文鑄山煮海富研述四始六際逾紛  
綸上追申克溯元本下揖亨萇相討論十年書成付庭鯉  
六經未有如詩尊乃知文字有元氣得古獨厚方深醇辦  
香欲祝來已晚私淑尙有伊川孫厚是眞窺見法眼藏不  
啻皇甫來韓門三時抱簡聲常吞先生賁志良苦辛方今  
幸值

右文代石渠眾彥趨如雲此書一出有目見先遣雅奏從  
天聞一編家置意中事但恨不及當公身時  
藏書將獻焉

題許萃和樂山書屋

昔遊何山奇東南黃海最但驚秀絕天地閒終愁險出人  
情外此地合讓天爲都遊之且難而況居若論卜築何者

得我作主人山作客不待招邀滿戶庭常與幽人借顏色  
能化城市爲烟霞最好未有如翁家市聲只用一牆隔嵐  
翠已教三面遮看山得山自來處百里軒臺陡雲霧支峯  
散作萬馬奔昂昂欲過窗前去此中讀書生子孫那不頭  
角都嶙峋馮家四經舊守匣鄧氏一藝皆空羣方知愛山  
有真樂雀躍作遊吾自笑願託靜者爲平生此意久取名  
吾名行當脫卻謝公屐來看君家一桁青

題汪堃儀圖照

乘空列御是耶非廣袖飄如鶴退飛誰道高寒歸不得七  
重雲護半銖衣

雜題鄧素亭畫冊

月黯沈雲多山深夜泉長忽斷疏鐘撞誰敲石門響  
翁如訪戴行我願爲童子隨向溪橋邊韻入橫圖裏  
倦掩窗前卷閒揮膝上桐斜陽畱幾許雁背不成紅

別厚孫

用豆可合黃用麴斯成醴但覺相需殷焉能究其理吾行  
天下多未見如吾子立談只斯須感我胡能爾洵哉交有  
神作合非無以胷無古人多疇能愛知己語默關性情文  
章出根柢若失稽期生不相天下士所冀爲古歡其終一  
如始努力百年間聚散方自此

汪荆石以詩見投且索賦其齋頭古梅匆匆未有  
以應因書七月中所爲豐山古梅歌附題其後



朔風噤關晨不開忽報詩老傳詩來巡簷朗誦破寒寂尺  
幅似挽陽春回是何筆力桀且魁有解讀者知誰哉多時  
欲訪翁家梅歲晏苦被歸裝催翁今索詩爲花壽我欲賦  
此無翁才一詩成時一花放每看一花傾一杯翁家此樂  
在天上塵塚下士何由陪豐山古幹昨所詠爲愛昔者歌  
豪栽眼中翁在豪過此安用望古徒徘徊先將此札芥翁  
壁他時蠟屐來高齋作詩草草翁無哈

### 響山潭

一舟搖醉眠夢醒鵬聲響洞窗見長崖峭立森如掌顏光  
影澄流凝碧隨滉潏人言響山潭呼之應成兩三呼而三  
應高下隨所餉大聲旣隆隆小語亦朗朗昔詫石鏡奇鬚

睂了能仿茲能效無形乃真絕言想喧寂人籟兼鳴叩道  
心長迢然發鸞吟韻與連山往十年走塵中高唱無人賞  
得此爲同聲苦心殊未枉

練江舟中

青山萬疊江一線一葉扁舟下如箭船頭高坐披裘人終  
日看山如不見問君胡爲不見山山過倏忽迷茫閒崖連  
但若障迎面峽轉忽如天霽顏嶺上行雲半晴溼晴雲俄  
追溼雲及雨來只送山氣腥雨過頓助灘聲急星光漸大  
日已曛搖舟泊入千鷗羣磯頭石作琳碧燦水底沙皆蛸  
蚪文十年塵夢快冰釋中夜臨風展瑤席大魚聽曲來昂  
昂獨鶴掠舟飛拍拍夢醒遠柝聞五更茫茫露下空江平

舟人醉眠時  
讌語百呼不應  
天將明

冬日過西湖

寂寞樓臺鎖凍雲  
閒蹤惟我最殷勤  
西湖與爾堅相約  
一過錢塘一訪君

湖上羣山對酒尊  
無山無我舊吟魂  
不須剪紙招魂去  
畱伴梅花夜月痕

冬日克一過訪和贈

每經契闊想生平  
四海論交有少卿  
似我漸成心木石  
如君猶是氣幽并  
那愁白壁投無地  
多恐黃金鑄未精  
別後酒狂渾不減  
月斜舞影共參橫

不愧狂名十載聞  
天涯作達儘輸君  
移栽洛下花千種  
醉

倒揚州月二分翻笑古人都寂寂任他餘子自紛紛樽前  
各有飛揚意促節高歌半入雲

知君興盡欲回舟日暮天寒不可留百歲去時何鼎鼎半  
生行道苦悠悠青山未買元暉宅江水能言洗馬愁前路  
酒徒相問訊故人久已敝貂裘

謂令弟  
梓樹

癸巳除夕偶成

千家笑語漏遲遲憂患潛從物外知悄立市橋人不識一  
星如月看多時

年年此夕費吟呻兒女燈前竊笑頻汝輩何知吾自悔枉  
拋心力作詩人

別稚存

莫因失路氣如灰  
醉爾飄零濁酒杯  
此去風塵宜拭目  
如今湖海合生才  
一身未遇庸非福  
半世能狂亦可哀  
我剩壯心圖五岳  
早完婚嫁待君來

別陳秋士次韻

新知雖樂奈愁何  
相對空爲斫地歌  
去國反如歸思急  
異鄉偏聚故人多  
懷君曉岸垂垂柳  
送我春江淼淼波  
何日荆南山色下  
一條銀燭共微哦

春燕

畫梁仍在故巢傾  
誰遣依人又此行  
日暮庭空飛不去  
閒花於我舊關情

誰與高樓伴苦辛  
重來非復昔時春  
只言世上多關盼  
初

念何曾薄待人

王謝烏衣眾所誇託身未肯戀繁華誰知覆雨翻雲恨轉  
在尋常百姓家

迢迢故國去來休莫爲無情特地愁見慣蜃樓渾不訝我  
家原在海東頭

兩當軒集卷第九

兩當軒集卷第十

武進黃景仁著

古近體詩六十五首

孫薇隱自句曲歸以詩示輒題於端卽和其春日  
枉贈之作

句金之壇聞有陵云可度世而上昇東南一竅闢地肺綿  
延休氣時雲騰華陽玉碣閉千載登空有躋誰其乘我生  
夢見且未得君有仙骨君先登神君抗手不復顧曲城閭  
闔呼可騰江山文藻待洗刷乘風欲去何由能譴訶元放  
叱抱朴笑彼過客如風燈叢花匹練俛下界幻作組繡羅  
君膺歸來脫褻出奇句是何光氣誰依憑試聽擲地響金



石不然捫字生圭稜竹墳篆鼎披詰屈冰車鐵馬驅凌兢  
星枝落筆芒四射虹血漉劒斑初凝不愁嘔心鉢肝腎雲  
夢八九胷浮蒸始知名山助力技至此矣胡能稱靈蛇  
荆壁家所握嘈囋眾響喧蛙蠅君其一出空所見如以赫  
日消春冰由來文章貴瑰傀肯襲蹊徑循畦塍雲君山鬼  
義斯正墨兵蒙寇言差恆云奇豈復古人過況以常語相  
因仍長庚星死玉樓召此事讓君三折肱參之韓杜得沈  
冪大厥門戶歸高曾遊山讀書更十載恐絕來者難攀承  
我方兀兀弄鉛槧才幅偈仄無尺繒惠連得句自吟賞東  
哲漫語叢譏懲謬達作者癖痂嗜積氣得吐相誇矜憶從  
去春枉君作遲久不報理詎應苦緣望氣已辟易疲軍再

鼓嗟難興傾心倒意詎能默聊用撮壤崇山層自知俗骨  
不能換煩君汲引拋長繩朗吟偕訪舊遊去挈我騎二茆  
龍升

贈明分司春巖次蔣清容先生韻

三首之二

繡虎才名威鳳儀望塵爭悔識君遲暫勞官海籌平準小  
試調羹寄職司臥榻魚龍看變化故家陵谷歎遷移  
尊人方伯  
以事繫廷思親北斗闌干夜耿耿星杓欲化箕  
尉家籍沒

天於豪傑試艱難未許烟波把釣竿寶玦僅存心愈壯明  
珠雖去海尤寬鶯花南國思公子父老東郊拜長官相望  
甘棠餘蔭在莫瞻直北涕闌干

君曾隨尊人官江南十餘年

廣陵雜詩

終古垂楊色春來似畫圖  
烟花正南部盜賊已東都  
四帳冷秋月十宮平綠蕪  
至今渦水上流恨失頭顱

繁華關地脈剝復見天心  
徹夜金銀氣摩空車馬音  
銅山家萬戶綺食宴千金  
誰識淮南客閒從局外吟

不作揚州夢時因載酒過  
但聞花歎息似有鬼清歌  
城郭黃流近樓臺暮氣多  
討春何限好其奈晚秋何

和錢百泉雜感

先生執拂談經處坐覺涼  
秋六月生多少聚囂門外  
客一聲鐘後更無聲

沸天歌吹古蕪城  
淮海波濤自不平  
手指秋雲向君說  
可憐薄不似人情

臣本高陽舊酒徒未曾酣醉起烏烏  
禰生謾罵奚生傲此輩於今未可無

飢烏

啞啞啼烏翅倒垂託身偏擇最高枝  
向人不是輕開口爲有區區反哺私

重九後十日醉中次錢企盧韻贈別

摩挲蠹簡熨心香癡絕吾師顧長康  
詎擬高飛凌俊鶻只吟苦調鬪寒蜚  
長松骨節摧和嶠衰柳腰肢瘦沈郎  
搖落不堪重錄別秋風初束舍人裝

痛飲狂歌負半生讀書擊劒兩無成  
風塵久已輕詞客意氣猶堪張酒兵  
霜滿街頭狂拓戟月寒花底醉調箏  
誰能

了得吾儕事莫羨悠悠世上名

肯容疏放卽吾師花月文章皓首期那覓酒能千日醉不  
愁音少一人知身名已分同飄瓦涕淚何曾滿漏卮幸有  
故人相慰藉瀕行拋得是相思

無端被酒復沾襟秋氣偏傷壯士心幾見拖腸真有鼠誰  
於焦尾更名琴經霜路草難承屐冒雨籬花不滿簪同記  
尊前蕭瑟意舊遊魂夢好追尋

偕邵元直毛保之遊虞山破山寺遂達天龍庵尋

桃源澗

茲山海隅勝佳名昔耳食命儒得所導快陟如舊識千嵐  
忽霞燦目光訝頻拭萬樹霜楓林豔此天地色助以朝陽

輝絢爛斯云極入林甫一轉已忘山南北素石兼長松彩  
翠相鏤飾妙繪不到處化工展匠力應接搖吾精十步須  
九息面面圍錦障陰陰藏淨域奚俟窮幽探茲觀生未得  
誰云秋山空林暗日卓午寺門影遙紅幽敞形構古高僧  
一指禪破山作山祖石幢鐫寶文珠閣散花雨寺後竹千  
頃一綠上眉宇松閒就僧飯窗際聞樵斧枯澗積葉深葉  
底暗泉吐度狖登山椒憩足匪一所回頭俛僧寮繚曲見  
窗戶高處何所聞嘹嘹雁相語

登高易心瘁況茲搖落辰我行深林中敗葉如隨人前峯  
忽中斷平野連城闌人氣此焉聚上結濛濛塵誰知我曹  
樂迴與太古鄰日華轉壑底霜氣清崖垠更愛佳石淨皴

瘦無輪囷每坐不忍移撫之輒生溫遙山萬千疊何處平  
吾身

下山行別僧歸逕屢轉右鐘聲忽遞風尋之越岡阜依然  
邁精藍行近不知有逕造竹閣吟坐聽澗聲久尋源得奇  
絕石理若瓜剖平落十畝寬側撇千丈陡想見春水生百  
萬玉龍走暝色沈鏡光欲攬不在手未窺山面全佳處吞  
八九劒門拂水崖較此孰前後明發更扳陟斯遊庶無負  
題鄭秋堂山水幅

君家三絕此其一畫此春山白雲出春山鬱鬱何蔥蔥雲  
捲忽隨縑素空偶然斷出林岫色複疊不知千萬重長松  
飄風子墮瓦下有讀書長歎者坐看生滅雲耶山斯人懷

抱豈等閒我欲扁舟一相訪側身天地何由往

展叔六先生墓

龍蛇往歲訢崩奔宿草傷心滿墓門弟子下車惟有慟先生高臥竟何言隻雞久負平生約一劒空懷國士恩令子成名公不見此時悲喜總難論

嗣君培德今年舉於鄉

傳經舊地黯凝塵七載飄零寄此身入世日還深一日愛才人總遜前人山邱涕淚關存歿衣鉢文章共苦辛後死亦知終未免願分抔土作比鄰

偕邵元直遊吾谷

此閒看山復看楓谷口敞與平原同長崖一障日邊雨高樹獨搖天半風側身忽覺軀幹小挈友況在神仙中山靈



極知我曹樂畱住絕壁殘陽紅

大雷雨過太湖

甲午十月十一日將從具區歸吳淞曉來風日頗蒸鬱氣  
似盛夏非初冬人憂中渡有疾警舟無十斛波千重平生  
涉險輕性命況乃風便時難逢張帆逕渡不顧反去厓稍  
遠聲洶洶舟空帆足半掠水或出或沒疑游龍此時狂喜  
呼絕倒一霎快意天所供天如念我有奇癖忽然大笑電  
目睦東西閃爍雲四結如波萃萃如霞封俄兼墨色變深  
紫半天赫赫垂噴容遂聞雌雷轉水底飛廉屏翳驅相從  
鞭馳百怪起狂鬪列缺吐燄遙傳烽此時我舟助顛簸如  
山巨浪相撞衝我張空拳奮叱咤欲與霹靂爭其鋒暗中

不識神鬼至時有赤蛇飛貼留雨聲夏驟雷更疾一聲恪  
恪雲蓬鬆漸看雲氣斂餘怒略見雨腳收狂蹤回頭咫尺  
語舟子事已至此無恟恟尙餘徑寸未登岸莫計明日能  
朝饗我思陽月陽退聽豈宜玉虎鳴其宛易占冬雷有明  
驗驗必地震年斯凶果爾微軀詎足惜行且累及千吳儂  
華堂豈少失箸客此時萬口方詢詢誰知獨有浪遊子隻  
影汨沒隨鰕鱖不知怖心落何許反快一洗平生庸維舟  
得岸真幸爾轉思往境心如春驚魂或恐招不得已滅湖  
上之青峰

重過汎里寄懷龔梓樹

舊與梓樹  
讀書處

不款君扉歲九更偶因訪戴一經行

近萬黍  
維居宅

舊諳門徑詢

鄰里熟識兒童問姓名同學故人猶落魄重過班馬亦悲  
鳴荆南山色青無恙如代君家作送迎

乙未元旦

隔年鄉夢驟驚回萬戶頻將爆竹催拜跪畧稀身是客經  
書暫掩性猶孩遶牀懶使呼盧興闌座慙無射覆才我自  
愛吟人闌處空庭閒撫未開梅

呈袁簡齋太史

一代才豪仰大賢天公位置卻天然文章草草皆千古仕  
宦匆匆只十年暫借玉堂畱姓氏便依勾漏作神仙由來  
名士如名將誰似汾陽福命全

雄談壯翰振乾坤喚起文人六代魂浙水詞源鍾巨手秣

陵秋色釀名園幾人國士曾邀盼此地蒼生尙感恩我喜  
童時識司馬不須擁簪掃公門

煥室風亭翠靄閒藥欄花徑互周環半篙後主迎涼水

有園

溪舊志爲南唐納涼所

一桁前朝戲馬山似海繁華歸彩筆極天花

月養蒼顏誰知泉石皆經濟此意先生詎等閒

偶逢佳日徑開三絲竹聲攙笑語酣帳後金釵分左右筵  
前竹箭盡東南張燈高會星千樹蕩槩清歌鏡一潭不與  
西園冠蓋末可知才具本難堪

去秋先生招  
宴以病未往

### 春曉

黯黯復沈沈虛堂擁薄衾枕邊尋斷夢門外釀輕陰謝識  
孤花意歸知獨雁心

二語夢  
中得

峭寒猶似許不道入春深

十四夜

照夜輝銀蠟當筵湧白波醉嫌千日少事到十年多皓月  
常相似清歌不奈何歡場如不散那用涕滂沱

十六日

無端新恨鎖眉頭暗省韶光似水流自過百花生日日一  
分春是一分愁

庭中落梅

憑誰蕭寂破幽容愛惜芳菲意較濃早得名花連夕雨極  
銷魂事五更鐘自矜標格癡非福老見繁華夢亦慵省識  
此時零落恨石欄干外蘚重重

將爲北行畱贈沈楓埤

入春五十餘十日九陰晦釀此將離天行坐輒吁嘸朝夕  
聞書聲寓齋與君背時一相過從深談吐肝肺君才十倍  
我抑抑善謙退計我客姑孰一至今已再昔君方髫齡已  
露岐嶷槩賦詩倒座客徵故傾前輩重來益深造銜華實  
爲佩鉤探積籍精斂氣羣經內方今重實學大義了無昧  
翩翩虎觀儒大呼破囂憤眼見吾子出鸞翔應當代乃公  
賢刺史既堂先生高義屬嵩岱更於寒微士加以性命愛元氣  
之所鍾於君福斯載我欲爲諛詞不忍爲此態我欲揚君  
名焉得家置喙見君學殖堅愧我舊業廢漫爲人海行毋  
乃笑褫襮去程越河岳離心渺關塞念念自今始兀兀暫

相對

將之京師雜別

翩與歸鴻共北征  
登山臨水黯愁生  
江南草長鶯飛日  
遊子離邦去里情  
五夜壯心悲伏櫪  
百年左計負躬耕  
自嫌詩少幽燕氣  
故作冰天躍馬行

看人爭著祖生鞭  
彩筆江湖燄黯然  
親在名心畱百一  
我行客路慣三千  
誰從貧女求新錦  
肯向朱門理舊絃  
吳市簫聲燕市筑  
一般悽斷有誰憐

窮交數子共酸辛  
脈脈臨歧語未申  
割席管寧休罷讀  
分財鮑叔尙知貧  
初心小負樓巖約  
後會依然戴笠人  
除是白雲知此意  
幾曾情豔軟紅塵

說著因人意轉慵  
沙痕到處印泥蹤  
原嘗好客依都遍  
鄒

季論交別更濃浪許詞場誇姓氏要將人海盪心胷不妨

面似先生黑上帝何曾殺黑龍

事出墨子

身世渾拌醉似泥酒醒無奈聽晨雞詞人畏說中年近壯  
士愁看落日低才可升沈何用卜路通南北且休迷只愁  
寒食清明候鬼餒墳頭羨馬醫

載酒扁舟障錦車風情無際擅年華牽魂西子湖頭月照  
淚吳王苑裏花已是舊遊如夢境況經遠別更天涯馬頭  
細草茸茸碧來歲相看可憶家

賈禮耕用昌黎石鼓歌韻贈詩和贈一首

我生耳不別風節而愛清廟明堂歌夔襄子野不在世奈  
此哇咬羣聲何或歌變羽亦快意驟馳鐵馬揮金戈詞人



久放防露作音雖噍殺終難磨半生古意徇同調企心疲  
想空蒐羅誰知古調屬巨手魯靈光殿瞻我我世人求見  
路相左不在朝市藏巖阿魚龍風雨各變態憑君一氣之  
所呵文章鼓吹有根柢以混凡響奚能訛異書夢見身化  
蠹奇字飽積胷盤蜩長源闊瀾絕游溯槎犯牛斗梁黿鼉  
觀君筆陣卻而走狂叫百巾巡庭柯魂迷上下九枝日  
眩經緯羣龍梭傳聞揮毫復容易若不欲作聊委蛇陸離  
瑰魄乃有此便恐雨逗勞媧娥彫觚元氣鑄福命我爲此  
老揮滂沱蓬行鵲起頓塵壤壯士窮老歸平和但聞洛陽  
負奇望不見島佛身登科他人慍色君莞爾世上餘子紛  
何多感君意厚借餘論愧我蹇才同伏駝脫非知己孰華

予逕持布鼓雷門過不材敢溷匠石斲朽骨妄冀良工磋  
南州昔日富文藻騎鯨客去江猶波青天明月不改色厯  
照過客無偏頗生同斯世遊共國高談痛飲寧論佗我曹  
世外結心賞豈似羣論工嬋婁一編落手等性命兩髀生  
肉徒摩挲憐余親在有行役青山采石畱君哦此時暫作  
失羣雁他日願化聽經鵝相從親受法眼藏奚事鑄像參  
禪那汰淘眾響出金石發揮大義追卿軻書成倘許附姓  
氏相與萬古流江河君其書銘置我座勉旃小子毋蹉跎

清明日偕賈稻孫顧文子丁秀巖登白紵山

平原二三月百卉豔天地輕雲盪風光野馬走山氣灰心  
忽飛揚聯翩逐遊騎游意莽闔寥肯爲尋芳膩登峰須第

一腰腳久未試水盡乃得山嵐回適藏寺客有霞外賞獻  
落松閒吹長江獻浮練羣峯合晴翠當年蝟鬚人憑陵極  
雄恣世不生英雄此亦可人意歌舞爲塵埃風景苦無異  
弔古兼傷春我心悄然悴日暮歸去來精靈脫相魅

太白樓畱別史貳庵

五年三度客南州強半登臨在此樓若使人生無別恨只  
除江水不東流歌殘白紵辭官閣吟斷青山上客舟卻羨  
姑溪溪柳色解將青眼爲君畱

三月十三日沈旣堂先生座中十二人合年五百  
歲分韻得少字

繁葩綴霞林爛茲九春杪敞扉開長筵竹箭盡江表繁惟

主人賢高義雲日曠奉觴壽北堂分潤及賓僚或年如日  
東或姿等松矯一與斯燕中盡作期頤兆緯知昴宿兼聚  
嫌德星少屏去雲母障帷撤絳紗繞枰楸落蜚英壺矢靜  
風篠酒氣禁宵寒燭光敵蟾皎卯飲兼夜遊黃昏連白曉  
匪曰耽燕衍古歡合清醪我輩客天涯聚散枝上鳥去日  
何堂堂後會方渺渺眷言主情厚頓釋羈愁擾錫類惟綿  
長回心更傾倒給席喜價增齋翰疚言小行買千丈絲一  
繡平原趙

月夜渡采石懷當塗諸友人

高城鷁難望山暝日飄忽喚渡橫江時蒼崖已棲鷁牛渚  
靜驚濤天門鎖雙闕江隨花月夜舟與水雲發風細不滿

帆露重漸盈轆萬響俱寂寥微波偶瑟汨租船高詠沈畫  
舫清遊歇試問古來人共此青天月撫景方沈吟懷人黯  
銷骨離歌閒微茫別宴散匆卒今宵江館中應有夢飛越

旅館夜成

斜月陰陰下曲廊燕眠蝠掠共虛堂牀頭聽劒鐸成響簾  
底看星作有芒綠酒無緣消塊壘青山何處葬文章待和  
燭舅些須語又恐添渠淚一行

壽州贈知州張蓀圃先生

蘭臺虎觀孰稱雄大有人藏吏隱中入夢三刀銜甫換隨  
身萬卷橐常空天教經術成經濟我識才工勝宦工循吏  
儒林更文苑他年佳傳總歸公

山右文章舉世推  
濱江桃李遍新栽  
知公獨有千秋意  
造士皆成一代才  
大雅扶輪歸老輩  
小山承蓋屬興臺  
自慙漂泊淮南客  
又款侯門得得來

登寓樓

書劒勞勞久倦遊  
偶思清獻得高樓  
淮山中斷開平楚  
潁樹遙分見數州  
地僻市官偏倨傲  
年荒關吏且窮愁  
鄉心絕似胎簪水  
日夜東南不盡流

雨後寫望

彌空水氣自魂魂  
雨過長淮已到門  
七十二川流合處  
一條清潁不曾渾

題錢雨樓圖照

天然臞隱骨嵯峨破絮蒙頭自苦哦殘雪一峯相對立不  
知清氣落誰多

凍合千林鳥斷羣此閒位置儘宜君誰知萬仞高寒意沁  
入詩脾已十分

院齋納涼雜成

每聞暮鴉聲窗暝已輟讀鴉陣日一過半空聲肅肅前者  
若得意後者奮相逐最後或兩三哀鳴飛更速怪問旁人  
言市後有喬木日出鴉四飛日八羣就宿吁嗟復吁嗟我  
豈如此鴉

平頭搖大扇不如風自來細竹略成響已蕩疏襟開竹氣  
況自涼無風亦佳哉我行達淮潁土性竹不栽得見三兩

竿貴重如璠璣寓齋偶具此雖少有卽佳經春更添筍綠  
蔭將成堆呼童日扶灌相對時銜杯故山足千畝一一驚  
春雷胸吞不能盡多者伐作柴其下坐故人念我應徘徊  
爲師實人患而我適坐之奇字或相叩大半心然疑所媿  
來問意贈爾惟不知比舍聞誦讀暇卽相追隨露坐當風  
軒談劇鮮所羈聚首豈不樂安能無別離努力二三子何  
患乎無師

去歲此方旱地有千里赤江甸流饑民淮關斷沽舶米貴  
淮南時正值我爲客今春好雨暘喜見收二麥新陳米未  
交斗價尙三百又聞故鄉田多蝗土將石我家無負郭更  
復艱朝夕居行兩心悸救貧少長策東南民易疲豈任荒



歉積中宵望天雲殷憂定何益

尋墓篇爲程仲南作

出亦悲入亦悲兒悲不爲寒兒悲不爲飢問之旁人那得

知解一父一而已母有前後生我者父天父卽母母死不得

母葬所蒼蒼之天實誰咎解二一燈熒熒父病在牀願語七

歲兒佗時歸母葬故鄉於何求之詢渭陽於何詢之之胸

陽解三胸陽十萬戶一一歌鐘起問我舅氏家老成已謝孤

子死惜問舊鄉里呼名半人鬼母墓不可得不得墓兮不

可以爲子解四朝出郭門望暮出郭門望淚痕著樹樹枯死

芳草爲不芳誰何白鬚一老翁指點抔土沙堤旁幾年寒

食無酒漿幾年野火驅牛羊人言此事五十有餘載今得

歸母葬故鄉

五解

兒寒不愁兒飢不愁兒名不欲傳萬口兒

事不欲傳千秋願人尋墓墓卽得吁嗟此意無人識

六解

### 言懷

聽雨看雲暮復朝誰於籠鶴採丰標不禁多病聰明減詎  
慣長閒意氣消靜裏風懷元度月愁邊心血子胥潮可知  
戰勝渾難事一任浮生付濁醪

豈意瞢騰便到今一聲鐘動思惜惜蝨魚枉食神仙字海  
鳥空知山水音千載後誰傳好句十年來總淡名心何時  
世網眞拋得只要人間有鄧林

### 得家書悼殤女

初月才生落已催好花差喜未曾開珠從慈母擎中奪書

自山妻病裏裁終傍人家何足戀暫爲而父詎忘哀我從  
客邸開緘慣略欠平安是此回

晚眺

關河容易入斜曛獨立蒼茫數雁羣樹裏沙淮流漸合門  
前梁楚地初分天黏野草疑無路風旋驚鴉忽入雲我意  
先秋感搖落澤蒲汀柳漫紛紛

淮上夜發因憶壬辰之冬偕稚存隨朱笥河先生  
按部經此倏三載矣悵然有作寄稚存

平沙渺渺烟蒼蒼長淮晚來沈鏡光舟行十里復五里一  
鉤新月懸危檣楚火星明兩岸極浦清歌入天半七絃  
罷彈觴不傾默聽離心倏零亂一半催成風水愁分明訴

出飄零怨我心根觸非酒悲坐有往事勞沈思山川風景  
了無異絕憶此流初汎時東山賓從南州客顧榮羽扇桓  
伊笛前舫謹呼句落成後舟笑語風吹逼我舟李白同醉  
眠醉後亂拍洪崖肩歎歌懷古樂相樂望者誰不稱神仙  
只言好景堪把玩誰知過眼皆雲烟太息吾徒二三子半  
脫芒鞋著珠履客路空追大小山離程已判東西水十年  
湖海慙浮名再來跡比清淮清登艫依舊美清夜卻對長  
年訴愁話素志難移橘柚根微軀不及鼃鼃化我欲招隱  
山之幽多恐歲晏難爲畱似拋雞犬未仙去管領別離無  
限愁回頭卻望聽歌處已失八公山上樹

題李牧堂青巖圖

重崖疊巘氣冥冥寄爾乾坤一草亭壁上龍蛇藤補屋枕  
邊風雨樹穿櫺才名此日兼三絕筆墨他年護百靈豈合  
斯人老邱壑將來麟閣要丹青

中元

裁蓮作燈燈七葉百萬光從水閒出鳳膏著露精靈愁蛭  
脂映溜蛟龍泣迴光卻射恆河邊極天餓鬼來如烟幡幢  
花果遍世界哭來笑去風飄然東家女兒巧心思剪得濃  
花似儂媚自禮金仙守夜分不捲風簾養燈穗五更以後  
珠斗斜野火散滅人還家嫩涼各抱蘭氣宿遍地露蟲鳴  
緯車孤館空香步塵跡似有秋魂弔書客爲君更唱鮑家  
詩愁烟裊盡東方白

秋夜

燭跋燒殘擁薄衾繞廬策策響疏林漏沈二十五聲點雁  
送三千餘里音櫟社人閒幾零落桂叢天半自陰森蹉跎  
淮海誰相訊夢向白雲迷故岑

兩當軒集卷第十